



**Uunga siunnersuut: Ilinniartut ineqarfii pillugit Namminersorlutik Oqartussat inatsisaat nr. xx, xx. xxx 2019-imeersoq (Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)**

2017-mi Inuit Ataqatigiinniit naalakkersuisooqataanitta nalaani taamani Naalakkersuisuusut suliaralugu aallartippaat ilinniagaqarnersiutinik ilinniartullu ineqarfiini ineqarnermut akiliutitigut iluarsartuusseqqinneq. Sulinerup taassuma inerneru ullumikkut isummerfigissavarput. 2017-imi siunertaasoq naapertorlugu sulinerup ingerlanneqarsimaneranut, tassunga ilaalluni tusarniaanermi akissutigineqartut tusaaniarneqarsimanerinit, Ilinniartitaanermut, Kultureqarnermut Ilageeqarnermullu Naalakkersuisoqarfik nersualaarusupparput.

Ilinniagaqarnersiutinut ilinniartullu ineqarfiininut tunngasut suliassaqarfiit ullutsinni atorfissaqartitanut piumasaqaatinullu naleqqussaaffiginissaat ukiorpassuarni utaqqineqarsimavoq. Tamannami pisariaqarpoq. Peqatigisaanik atorfissaqartippagut kollegiatut inissiat suli amerlanerit, 2024-illi aallartisimalereranut utaqqisariaqarpassikkunarpuq kollegiani inissiat 1000-it missaanniittut tamarmik naammassineqarlutik atorneqalersimanissaannut. Ukiut kingulliit 15-it ingerlaneranni takusinnaasarput tassaavoq inuiaqatigiinni ilinniakkamik naammassinnittut amerliartornerat, kissaatigaarpullu suli amerlanerusut ilinnialernissaat, sulisoqarnikkut nunatta atorfissaqartitaasa amerlanerpaat pigilernissaat anguniarlugu.

Oqimaaqatigiissitsineq uani pingaaruteqarpoq, tamatumalu ataatsimoorussiffiginissaa suleqatigiissutigissavarput.

Naalakkersuisut siunnersuutaannut ilaavoq ineqanermi kiisalu kiassarnermut, innaallagissamut assigisaannullu atuinermut akiliutit assigiiartunngortinnissaannut tunngaviummik isummernissaq. Ilaatigut isertitat aallaavigalugit ineqanermut tassungalugu tunngasunik atuinermut akiliisalernissamut tunngasut paragrafit 15-ip, 16-ip 18-nillu qaqugu atortuulersinneqarnissaat Naalakkersuisunit ullulerneqarsimangilaq. Ilinniartooreersuni ilinniartunngorumaartunilu nalornineq pinngitsoorniarlugu Inatsisartullu aalajangiinissaminni toqqammavissaat pitsaanerpaatinniarlugu paaserusupparput paragrafit pineqartut qaqugu

atortuulersinnissaat Naalakkersuisut pilersaarutigineraat. Isertitat aallaavigalugit ineqarnermut tassungalu tunngasuni atuinermut akiliisitsisalernissamut tunngaviusumik isummernissaq immini tunuarsimaarfiginngilarput, uanili siunnersuummi ersittoqanngilaq isummernissamut tunngavissanik suliareriikkanik, tamannalu maanna ilinniartuusunut ilinniartunngorumaartunullu kingunerloriaannaamat uparuarusullutigu. Apeqqut tassaalerpoq ilinniartunut aningaasatigut annertuumik sunniuteqarsinnaasoq pillugu piginnaatitsissummik annertuumik imaqartumik apeqqummut uunga Inatsisartut Naalakkersuisunut tunniussiniarnersut.

Kollegiat ullutsinni ingerlanneqartut nutaanngitsorujussuarnik nutaalluinnartunillu initaqarput.

Uagutsinnut pingaaruteqarpoq ilinniartut kollegiani nutaanngitsuni najugaqartut assersuutigalugu kiassarnikkut annertuumik atuiffiusariaqartuni najugaqarsimagunik tamanna pissutigalugu allanut sanilliullugu annertunerujussuarmik akiliisalinninnissaat.

Aamma ilisimavarput kollegiat ilaqarmata kiassarnermut imermullu atuinermi immikkut uuttuuteqanngitsut, allallu atuinernut akiliisussanngortinneqassagunik tamanna pissusissamisoorinnaanngimmat.

Kollegiani init qanoq akeqartinneqarnissaannut toqqammavissaq pitsaanerpaaq pissagutsigu suliassaq annertoq peqqaartariaqassasoq takusinnaareerparput.

Ilinniarfiit ukiaanerani aallartinnerannut atatillugu paasivarput ilinniartut arlallit inissianut oqummik ajornartorsiuteqarfiusunut inissinneqarsimagaluartut allanut nuttaariaqalersimasut. Taannaannanngilaq, aammali ukiut siuliini ilinnialertartut tamatuminnga naammattoorsisartut tusartarpagut. Kollegiat eqqartortillugit Naalakkersuisunut apeqqutigerusunnarpoq kollegiani oquup qanoq annertutigisumik ajornartorsiutaasinnaanera ataatsimut isigalugu ilisimasaqarfigineraat, tamatumalu annikillisarneqarnissaanut iliuusissanik sunik aallarnisaasimanersut. Tassami oquk kollegiani inigineqarsinnaasut qanoq amerlatiginernut sunniuteqarluarsinnaamat, minnerunngitsumillu ilinniagaqartut ataasiakkaat peqqissusaannut taamatulli sunniuteqarsinnaalluni.

Kollegiatut inissiat akiat eqqortoq inissinneqassappat tamatumunnga tunngaviulluinnartaqarpoq kollegiatut inissiat qanoq ittuunerisa ilisimalluinnarnissaat.

Kaammattuutigissavarput ukkatareqqullugu kollegiat eqqarsaatigalugit sooq Namminersorlutik Oqartussat kiisalu Kommenut tamarmik immikkut ingerlatsisariaqarnersut. Suna ajornartorsiutaava ilinniagaq suugaluarpalluunniit kollegiat aqunneqarnissaannut isumaginnittussap ataasiinnaanissaanut?

Tupigusuutigineqarsinnaavoq ilinniartut praktikkertut kollegiani najugaqarnerminni ineqarnermut akiliutaasa ingerlaannartumik ilanngaatigineqartannginnerat, soorlu ilinniartuunersiutillit taamatut pineqartartut. Teknik tamatumunnga aporfiusimappat soorluuna ajornanngitsuarsuussagaluartoq praktikkertut kollegiani ineqarnerminnut akiliutaasa ingerlaannaq ilanngaatigineqartarnissaat, taamaasilluni ineqarnermut akiitsoqalersinnaanerup pinngitsoornissaa qulakkeerneqarluni.

Taamatut oqareerluta ilinniartuunersiuteqanermut kollegianullu tunngasumik iluarsartuusseqqinnermi sulineq qanimut malinnaaffigissallugu qilanaaraarput. Ataatsimiititaliamullu susassaqtumut ingerlaqqinnissaa innersuussutigivarput.